



যায়যায়দিন
২২.০৬.২০০৭

ইউএসটিসির সমাবর্তনে প্রেসিডেন্ট ড. ইয়াজউদ্দিন
গ্রাম ও শহরের শিক্ষার্থীদের গুণগত
ব্যবধানের কারণ খুঁজে বের করুন

চট্টগ্রাম অফিস

গ্রাম ও শহর এলাকার শিক্ষার্থীদের মধ্যে গুণগত ব্যবধান সৃষ্টির মূল কারণ খুঁজে বের করার জন্য সংশ্লিষ্ট কর্তৃপক্ষের প্রতি আহ্বান জানিয়েছেন প্রেসিডেন্ট প্রফেসর ড. ইয়াজউদ্দিন আহম্মেদ। তিনি প্রয়োজনীয় পদক্ষেপ গ্রহণের মাধ্যমে গ্রামে বসবাসকারী শিক্ষার্থীদের মেধা ও দক্ষতাকে আরো বিকশিত করার সুযোগ দেয়ার জন্য সবাইকে একসঙ্গে কাজ করার আহ্বান জানান।
প্রেসিডেন্ট গতকাল দুপুরে চট্টগ্রামের

পাহাড়তলীতে ইউনিভার্সিটি অফ সায়েন্স অ্যান্ড টেকনলজির (ইউএসটিসি) তৃতীয় সমাবর্তন অনুষ্ঠানে প্রধান অতিথি হিসেবে উপস্থিত ছিলেন।

ইউনিভার্সিটির মওলানা ডাসানী অডিটোরিয়ামে আয়োজিত এ অনুষ্ঠানে সমাবর্তন বক্তা ছিলেন সাউথ ইস্ট ইউনিভার্সিটির ডিসি প্রফেসর ড. এম শমসের আলী। স্বাগত বক্তব্য রাখেন ইউএসটিসির প্রতিষ্ঠাতা ও ডিসি ন্যাশনাল প্রফেসর ড. নুরুল ইসলাম।

পৃ. ১৫ ক ৭

গ্রাম ও শহরের শিক্ষার্থীদের গুণগত

(শেষ পৃষ্ঠার পর)

সম্প্রতি প্রকাশিত এসএসসি পরীক্ষার রেজাল্টের উদাহরণ দিয়ে প্রেসিডেন্ট বলেন, এ রেজাল্ট গ্রাম ও শহরের শিক্ষার্থীদের মধ্যে বিশাল গুণগত বৈষম্যের চিত্র তুলে ধরে। এ বৈষম্যের কারণ চিহ্নিত করে সঠিক পদক্ষেপের মাধ্যমে তা দূর করার উদ্যোগ নিতে হবে। তা না হলে গ্রামে বসবাসকারী বিপুল সংখ্যক শিক্ষার্থী তাদের মেধা ও প্রতিভা বিকাশের সুযোগ থেকে বঞ্চিত থেকে যাবে। দেশের ভারসাম্যমূলক উন্নয়নের স্বপ্নও এ কারণে ব্যাহত হবে।
জ্ঞান ভিত্তিক সমাজ গড়ার জন্য প্রাথমিক শিক্ষা ব্যবস্থার প্রতি গুরুত্ব আরোপ করে প্রেসিডেন্ট বলেন, সামগ্রিক উন্নয়নের জন্য শিক্ষিত জাতি গঠনের লক্ষ্যে প্রাথমিক শিক্ষার প্রতি আমাদের আরো মনোযোগ দিতে হবে।
প্রেসিডেন্ট বলেন, একবিংশ শতাব্দীর চ্যালেঞ্জ মোকাবেলা করতে হলে বাংলাদেশের মতো উন্নয়নশীল একটি

দেশকে দক্ষ, কর্মক্ষম ও শিক্ষিত মানব সম্পদ সৃষ্টি করতে হবে। দেশের বিভিন্ন শিক্ষা প্রতিষ্ঠান বিশেষ করে ইউনিভার্সিটিগুলো যথার্থ শিক্ষা দেয়ার মাধ্যমে দক্ষ মানব সম্পদ সৃষ্টিতে জুমিকা রাখতে পারে।
চট্টগ্রামে সাম্প্রতিক পাহাড় ধসের ঘটনায় নিহতদের স্মৃতির প্রতি শ্রদ্ধা জানিয়ে প্রেসিডেন্ট, প্রাকৃতিক সম্পদ পাহাড় রক্ষা করার জন্য প্রয়োজনীয় সব ব্যবস্থা নিতে সংশ্লিষ্ট কর্তৃপক্ষের প্রতি আহ্বান জানান। তিনি পাহাড়ের ঢালে প্রাণের ঝুঁকি নিয়ে বসবাসকারী দরিদ্র ও অসহায় মানুষকে নিরাপদ এলাকায় পুনর্বাসনের জন্য সরকারের সংশ্লিষ্ট বিভাগকে নির্দেশ দেন।
প্রেসিডেন্ট গতকাল বিকালে চট্টগ্রাম ক্যান্টনমেন্ট এলাকার জাহাঙ্গীর লাইন স্কুলের আশ্রয় কেন্দ্রে সাম্প্রতিক পাহাড় ধসে ক্ষতিগ্রস্ত লোকজনের মধ্যে জাগসামগ্রী দেন। এরপর গতকাল বিকালেই তিনি ঢাকায় ফিরে যান।